

鄉土志業編

張國淦署





甘泉縣鄉土志目錄

歷史

一

政績錄

一

兵事錄

三

耆舊錄

三

人類

五

戶口

五

氏族

五

宗教

五

實業

六

地理

六

山

八

水

道路

物產

商務

八 九

一〇

一一

甘泉縣鄉土志

一 歷史

甘泉唐虞夏商爲雍州西河

周爲白翟武王放逐戎夷於涇洛之北名曰荒服晉文公復攘戎翟居於西河

圖洛之間見史記匈奴傳

白翟及秦同州今酈坊延綏皆古白翟地見鄭樵通志

戰國時屬魏爲雕陰邑東屬定陽地

秦爲雕陰邑屬上郡

漢置雕陰縣屬上郡爲并州刺史部東屬定陽縣雕陰縣城在甘泉縣南四十里

唐爲臨真縣後屬延安郡在今縣東一百八十里唐武德二年時有梁師都爲患突厥千騎踰延州而南營於野猪嶺嶺卽今邑之北界也特擇酈延適中地

建治爲伏陸縣屬鄜州洛交郡天寶元年改伏陸爲甘泉縣

五代因之

宋屬延安府

金仍舊

元至元二年將臨真縣併入焉現爲臨真鎮

明仍舊

國朝因之本境荒山重疊平地僅十之二三客民雜處者甚多土著僅十之一

二土瘠民貧幅幘遼闊戶口凋零村墟冷落實北山著名極苦之區也

一政績錄

蔡祖庚 字蓮西號鶯巖江南上元人順治乙丑進士歲庚寅宰甘邑適值亂

離之後土荒民散甘民幾至逃亡殆盡其下車之日目覩流離卽躬親赴省

哭訴民艱懇准除荒復又革去驛站馬頭以及里中私派於是甘邑之民始

未盡散在任四載後陞戶部主事歷太原知府所至皆有政績甘民爲立生

祠歲時享祀其著作悉爲珍賞詳載祠堂德政碑記中

余明彝 福建枝江人進士順治十二年宰甘邑時民多穴處蓬蒿滿城瓦礫堆署僅構茅簷以蔽風雨乃核定實在戶口詳豁逃亡丁名爲之佈置於是甘民始漸有土田室家之安祀名宦

劉汝植 直隸任邱人歲貢順治末蒞任時城中居民鮮少學校公署遭兵火殘燬無存而四鄉佛宮尙多有存者乃令僅留關帝廟其餘寺觀悉令拆毀取其材木修學校立公署而城中乃有室廬焉鬚長其色蒼白遠望似綠有綠鬚之稱後卒於官署

王 燦 字子美浙江紹興人進士康熙十四年朱龍叛縣城已陷率吏民守毛家菴砦賊日夜環攻極力捍禦賊誘之曰得見王令卽輟攻燦曰吾不忍以一人之故殃及吏民也遂單騎出砦賊擁之北行卽以所佩之印置煙洞中賊授以官爵曰吾爲朝廷吏豈肯爲賊吏乎拒之後得逃歸適大兵至遂分兵勦賊竟復縣城後陞任潼關廳

黃日煥 號媿哉福建永定人庚子辛丑聯捷進士博學能文初仕廣西知縣康熙十九年補甘泉時承平已久賦薄徭輕而甘泉每丁尙徵銀四兩六錢零除正額外包賠銀四百九十餘兩徵收三十餘年無能清釐乃查明全書舛錯處再四詳請遂蒙豁免勤於圖政不憚煩勞巡閱鄉庄勸課農桑一馬一僕無許供應旱則竭誠祈禱甘霖立沛虎不爲患奉委清丈中部查荒鄜州悉洽輿情旣又詳免延屬輓運遂謳聲四布遠邇交頌陞邳州知州邑民爲立生祠祀之

姜朝勳 字廣成江南丹陽人進士康熙四十三年任甘泉維時農事旣興乃親詣田畝一人携酒一人持杖勤者賞以酒惰者懲以杖其有貧不自給者發粟貸之尤勤於課士每遇課期落筆成文又創立義學延師課誦邑士皆蒙裁成文風少振康熙五十四年陞吏部文選司閤邑感恩頌德坊碑遍野民歌之曰居官十一載留恩千百年後祀名宦

吳敦儉 字友裴號約齋江南徽州府休寧縣人雍正四年宰甘泉吏治練達



決獄明敏倡修學宮捐修衙署補築壇宇在任十四年一切俱有規模且士  
治民安上台噐之差往哈密辦公卽以其胞弟敦徹來署縣事人以爲榮差  
還推陞廣東肇慶府同知引 見調浙江杭州府同知

汪永聰 字愷堂江南休寧縣人進士乾隆二十五年宰甘泉吏才敏捷決獄  
清慎重修城垣南北城門俱新建置纂修縣志傳至同治六年兵燹城陷志  
書遂遭焚燬後竟再無增修者在任善政頗多人咸稱頌三十年陞任知州

### 一 兵事錄

縣處邊陲爲延榆通衢漢匈奴魏羌胡唐突厥宋西夏明套虜皆邊患之大者  
而延屬正當蹂躪之衝邑侵掠攘據旋復旋失烽燧驚擾殆無虛日明代初興  
厥亂稍定至宣德以後套虜又深分道南侵延安等處殺掠人畜無算越四月  
副將韓欽禦之從慶陽出邊崇禎元年延安大饑李自成張獻忠作亂全境擾  
攘直至明末亂事頻仍我 朝定鼎仁威遠播賊黨悉除拓宇開疆中外一統  
邊庭荒服百餘年刀斗無聞烽火不驚迨同治五年甘肅猖獗固原慶陽

等州縣民逃難者絡繹不絕聚集縣西川府村鎮萬餘人六年二月遂與各處  
流民結黨倡亂三月二十八日城陷邑內房屋盡成焦土邑侯陳公殉難魯公  
學浩蒞任禦賊有術守城嚴密是年四月加以獬匪擾掠十月繼以髮匪犯境  
寇雖深而殘城無恙皆公設險保護之力也至今人猶感激七年公調任膚施  
十月城陷九年三月城又陷賊勢蔓延時沒四鄉滿目蓬蒿斗米錢六串  
有零人相食邇時若非倉糧接濟甘民幾無存者九年劉公瑞冕及陞榆林鎮  
劉公厚基漸次勦平甘民始闢草萊營廬舍四鄉漸有鷄鳴狗吠之聲究竟存  
留者不及什一

一耆舊錄

元

袁 榮 延佑間以舉人才擢用官至昭武大將軍歷有政績卒葬縣南七里  
窰店子坵上

蒲 庸 字時中留西里人至正中進士令城固興利除害民懷其惠爲立生

祠於斗山之麓歷官至御史中丞

趙漑 經術湛深至正中以薦舉起累官吏部尙書清介不阿爲一時名臣

明

開濟 字來學洪武初舉人授河南府訓導陞國子監助教以疾歸十四年御史大夫安然薦濟有吏治才召爲刑部尙書綜覈功過規定課程決遣軍民罪犯滯獄一清帝以爲能又議奏取士科條從之創造之初凡經制田賦工役河渠等事推濟裁畫悉有條理品式以是甚見信任數備顧問

楊榮 永樂間舉人官御史彈劾不避權貴卒以直諫掛冠歸里

石瑩玉 字崑岡覺德人讀書不事章句弱冠有名崇禎己卯庚辰聯捷鄉會闈釋褐曲沃縣清操自勵未閱一考而樞臣借才擢爲兵部車駕司主事瑩玉見國事日非不復仕居家孝友躬課子孫歲饑出粟賑貧鄉人德之卒祀

鄉賢祠

李芳 成化時生員博極淡於仕進耽情山水足跡罕入城市家庭孝友以

德化人咸稱爲隱君子焉

殷衡 宣化坊人究心儒士性理之學鄉里推重以歲貢仕華陰訓導

來承恩 生員來於階之子於階歿後其生母趙氏守志承恩事之至孝其先

墳石碑上忽現山水花木形遠邇聚觀嘉靖年旌表孝行

石天縉 主事石瑩玉之父富而好義天啓崇禎間代賠里中丁差賑恤貧病

一夕夢神語曰爾陰德浩大賜爾黃榜子孫瑩玉與其子之玫果先後聯捷

進士

國朝

石之玫 瑩玉季子少聰穎過目成誦登順治丁酉科鄉榜次年成進士初令

湘鄉以外艱歸補睢寧詳免淪湖荒地錢糧民慶更生睢當黃河之衝堵塞

決口累著勞績陞桃源河務同知兼攝宿桃屯河同知防禦險工清理屯地

均稱任使河督靳輔最所屬意遺疏舉薦旣擢河南府丁母憂起服後補徽

州府以前官留任改福州在任年餘勤幹廉靜後卒於淮之白洋河櫬歸

張拱辰 字觀光家貧力學事親孝親喪哀毀盡禮設教邑塾衣冠嚴重諄諄善誨登其門者咸有成就暮年振鐸郟陽多士景從旋告歸日夕就戚言歡一日早起櫛沐畢命具衣冠令子孫招宗族盡至作永別語一笑而逝壽八十餘郟陽士聞喪不遠五百里會葬

任熙載 字廣颺宣化里人廩膳生屢試前茅就學關中書院困於棘闈邑令馮士鑄延請教課並纂輯邑志生前多有著述奉二親孝友兄愛弟家庭雍睦甫及中年卽歿士林惜之

王用賢 字傳霖宣化里人少穎敏受知於縣令姜朝勳益奮勵學古後修省志吳尹敦儉委採訪邑事遂撰志稿一帙以廩貢授階州文縣訓導在任五年因裁缺告歸

李枝榮 廩生李煥仲子煥赴省試客死長安枝榮甫六歲聞之日夜號泣年十三獨往尋父骸滴血驗真奉以歸葬哀慕終身不渝邑令姜朝勳欣賞入

忠孝祠

古泉縣志 五  
任叙典 性情沈毅品行端方乾隆癸酉拔貢順天榜考選覺羅正白旗官學  
教習期滿選用知縣

一人類

本境居民皆係漢戶並無別種人類

一戶口

本境戶口經同治六年先以兵荒繼以疾疫終以野狼傷人於是逃亡者過半  
後復經光緒三年奇旱二十六年饑饉而逃散死傷者又去十之七八近年本  
境現在戶口實止一千二百五十戶男二千二百六十口女一千四百八十口  
合計男女共三千七百四十口

一氏族

本境無大姓氏族

一宗教

離縣四十里之道左埠居住天主教數人

一實業

邑俗類皆以務農牧畜爲本讀書者稀少亦不知事工藝商賈之業

士居十之一

農居十之九

工商居十之一

一地理

邑在西安省北距省六百六十里延安府南距府九十里東至騮馬橋係宜川

縣界計一百五十四里西至馮家河岔係安塞縣界計五十六里南至黃甫鎮

係鄜州界計四十一里北至交界碑係膚施縣界計五十三里東南至核桃樹

山係鄜州界計七十里東北至趙家圪坨係延長縣界計一百五十七里西南

至屈家圪係鄜州界計五十三里西北至馬超洞係安塞縣界計三十里廣共

二百一十里縱共計九十四里其中皆羣山環疊可耕之地百無一二居民零

落或十數里一村庄間有因荒山阻隔五六十里一村庄者氣候寒多暖少最

可慮者寒霜夏秋爲害四月霜侵嫩苗盡萎八月霜霏收皆秕粟卽豐年亦不過腹地之半稔一遇歉收卽成饑饉良由戶鮮蓋藏家無殷實是以困苦之况日形其甚興復之機無期可待古蹟祠廟大半傾圮湮沒坊表市鎮每多殘毀廢弛境內橋梁類皆短小窄狹略能通往來城內有 高等小學堂 係定陽書院改設 文廟 文昌宮 魁星閣 關帝廟內附設初等小學堂 城隍廟 南門外一里許有東嶽廟又三里餘有玉台觀今名太和山其上祀有 祖師殿 三清殿 西嶽樓

邑東鄉有臨真鎮內設分縣距縣一百六十里南界宜川境北界膚施境東界延長境西界本縣鎮內有 關帝廟 龍王廟 娘娘廟內附設初等小學堂 距鎮二十里有覺德村設有初等小學堂

邑西鄉有府村鎮距縣六十里南界鄜州境北界安塞境西界合水境東界本縣兵燹後祠廟市鎮皆殘廢無存土荒人稀爲五方雜處之區

邑南鄉有道左鋪鎮距縣四十里東界臨真鎮西界府村鎮南界鄜州境北界



本縣鎮內有 觀音閣 關帝廟 藥王廟內附設初等小學堂

邑北鄉有勞山鎮距縣二十五里東界臨真鎮西界安塞境北界膚施境南界

本縣鎮內有 關帝廟 龍王廟 馬王廟

距縣西北二十里有高家哨村設有初等小學堂越十里洛河西寺溝有 白

鹿寺爲古名寺今傾圮

本境分東西兩里曰東作里曰西成里東西分二十三里

東作里屬九

真川里 即臨真鎮距縣一百六十里

古谷里 臨鎮東川距縣一百九十里

東宣化下里 臨鎮東川距縣一百七十里

東宣化上里 臨鎮北川距縣一百五十里

東平里 臨鎮北川距縣一百四十里

太安里 臨鎮北川距縣一百三十里

新豐里 臨鎮北川距縣一百二十里

中川里 臨鎮北川距縣一百一十里

西平里 臨鎮南川距縣二百一十里

西成里屬十四

宣化里 縣城

西宣化里 縣東川距城三十里

景樂里 縣東川距城四十五里

集賢里 縣南川距城七里

南峪里 縣南川距城十五里

溫泉里 縣南川距城四十里

留西里 縣西川距城三十五里

秋林里 縣西川距城四十里

直樂里 縣西川距城六十里

撫安里縣西南川距城二十五里

仁壽里縣西北川距城十里

北宣化里縣西北川距城三十里

高禮里縣北川距城二十五里

衆寶里縣北川距城三十里

一山

伏陸山在縣東城內

文昌山在縣城南門外

東岳山在縣城南門外一里餘

太和山在縣城南三里餘

筆架山在縣城西四里餘

白馬雙峯在縣城西三里餘

龜山在縣城西北三里餘

太白山在縣城北七里餘

雕陰山在縣南三十里

門限嶺在縣南三十三里

神林山在縣西二十八里美水發源於此

小勞山在縣北二十里

大勞山在縣北二十五里

野豬峽又名亞支山在縣北五十里

大盤山在縣東川五十里

崆峒山在縣東鄉一百三十五里

鴉鵲山在縣東鄉庫兒川一百五十二里

清泉山在縣東南六十三里

一水

洛河水發源於甘肅環縣白淤山流自安塞縣來經縣西北交界馬超洞入境

向東南行五里至白鹿砭合寺溝水又東南行六里至自修川合自修川水又東南行五里至高家哨左合安溝水右合岳家屯水又向東南行五里合雷家溝水又向東南行至縣北合北小河水又向東南行一里餘合南門外瓦窰溝水又向東南行三里合司馬溝水又向東南行三里合煖泉水又行四里合美水又行三里合麻子街清泉溝水又行十里合甄家灣水又行五里合紅土溝水又行十里合道左埠街水再向南行三里至鄜州交界之黃甫鎮出境入鄜州境洛水性暴勢猛夏遇大雨時行山水陡發千溝萬川合漲一望無涯浪高一二丈此時常不敢渡有橋梁亦不能存留往往漂沒廬舍田禾且水性鹹不宜灌田傍水居者深以爲害春秋水勢退盡隨處可徒步而涉冬則水澤腹堅如履坦途

北小河自縣北交界處野猪峽山下發源向南行至大勞山合阿伏斤水至小勞山合王家塔水至臭河合臭河水至縣北門外入洛河訖

美水自縣西神林山發源泉去地一丈飛流激射厥味甘美以之作餽饌雖盛

暑不變味烹茗亦極香美隋煬帝游此飲之取入禁內縣遂以此得名後人以苦於轉輸遂錮其泉今水伏荆榛沙礫中細流向東行至孫家河出溝口入洛河訖

麻洞川一名馬市川自縣東北麻洞川發源向東北行合馬家坪水趙家坨水又向東南行合賀旗溝水庫兒川水至交界驪馬橋出境入宜川界訖

以上各水除洛河外或有春夏盈而秋冬涸者或有長年細流者然皆平緩淺狹舉步可越不能通舟楫

### 一道路

本境南門外渡司馬溝水越十里渡清泉溝水至麻子街左有支路自清泉鎮來渡本溝水行四十里來會本路再越十里至米家溝再越十里至甄家灣右有支路自府村鎮來逾蒙家灣山渡洛河行四十里來會本路再越十里至道左埠右有支路自府村鎮來渡洛河行五十里來會本路再越五里至黃甫鎮出本境與鄜州路接

本境北門外渡北小河向東北路行通野猪峽膚施界向西北路行通馬超洞  
安塞界自城東北路行越十里至臭河子再越十里至大勞山左有支路自馬  
超洞來逾白土坡山行四十里來會本路右有支路自臨真鎮來渡麻洞川等  
水逾大墩梁山行一百六十里來會本路再越十里至靈溝兒再越十里至蘇  
家河再越五里至野猪峽出本境與膚施路接

本境西依山不通行旅大路南行越三十里至甄家灣渡洛河逾蒙家灣山越  
十里至老人倉再越十里至劉家庄再越十里至府村再越十里至屈家圪出  
本境與鄜州路接

本境東倚山不通行旅大路北行越二十五里至大勞山鎮由山右入溝越十  
里至蘆家庄再越十里至許家圪塨再越十里至大墩梁山西麓再逾大墩梁  
四十里荒山至東麓再越十里至易橋屯再越十里至馬坊再越十里至金盆  
灣再越十里至麻洞川再越十里至梁家橋再越十里至西村再越十里至北  
姚家坡再越十里至傅家灣再越十里至臨真鎮由臨真鎮越二十里至覺德

村再越二十里至鬪馬橋出本境與宜川路接

一物產

本境天然產物無多並無製造之產

動物

牛 馬 驢 騾 猪 羊

境內貧戶居多其有力牧養之家甚屬寥寥且亦為數無多

植物

穀屬

粟穀

包穀

軟

糜

蕎麥

高粱

豆

有黃黑紫紅  
小碗凡六種

惟小麥因地氣寒冷不宜種植居民食麥皆由鄜州販運

蔬屬

韭菜

菠菜

葱

蒜

白

蘿蔔

白菜

洋芋

茄子

蔓菁

芹菜

辣子



木屬

松 栢 榆 槐 柳 楸 貝檔

雖有此種名目而成材者實少

礦物

本境南鄉窰店子往年間出煤炭現在無有

一 商務

本境土地礮瘠絕少出產所產之物運出外境者以猪爲大宗每年約能銷一千八百餘口值銀五千餘兩其餘羊隻羊毛燒酒麻油亦間有出境者然皆爲數無多值銀不滿千數運入之貨以布爲大宗每歲能銷七八十担約值銀五千餘兩所銷綿花估衣值銀約只四五百兩以故街市寂寥商賈稀少